

永樂大典

卷〇五四三 郊字

卷〇五四四 郊字

卷〇五七九 沙字

卷〇五七〇 沙字

永樂大典卷之五千四百五十三

十四文

郊祀神位

後漢東漢書祭祀志。光武建武元年。祭告天地。采元始中故事。六宗群神皆從。注。黃圖六宗。日月星山川海。星則北辰。川即河。山岱宗。三光。象明。山阜百川。衆流。滂沱。阜澤。以類相屬。名數扶望相序。二年制郊兆洛陽爲圓壇。中又爲重壇。天地位其上。皆南鄉。西上。其外壇上爲五帝位。青帝位在甲寅地。赤帝位在丙巳地。黃帝位在丁未地。白帝位在庚申地。黑帝位在壬亥地。其外爲壇重營皆紫。以象紫宮。日月在中營內南道。日東月西。北斗在北道之西。皆別位不在群神列。中營二百一十六神。外營四百三十二神。皆背營內鄉。中外營門封神合三十二。凡千五百一十四神。背中營神五星也。及中宮宿五官神。及五岳之屬也。皆外營神二十八宿。外宮星雷公。先農風伯。雨師。四海。四瀆。名山。大川之屬也。建武中不立北郊。故后地之祗。常配食天壇。山川群望皆在營內。中元年建北郊。使司空馮魴告高廟。以薄后代。吕后配地。數類漢明帝永平二年。以月令有五郊迎。

氣因採元始故事。兆五郊于洛陽。四方之兆各依其位。中央之兆在未。立春之月。迎春於東郊。祭青帝勾芒。立夏之日。迎夏於南郊。祭赤帝祝融。先立秋十八日。迎黃靈於中兆。祭黃帝后土。立秋之日。迎秋於西郊。祭白帝蓐收。立冬之日。迎冬於北郊。祭黑帝玄冥。各以四立日。黃郊則以季夏土王日。祀其方之帝。各配以人帝五官。及星三辰七宿。亦各以其方從祀。西晉晉書禮志。武帝泰始二年。詔定郊祀。南郊除五帝座。五郊因稱昊天。各設一座而已。時群臣議。五帝即天地王氣。時異故殊其號。雖名有五。其實一神。宜除五帝號。同稱昊天。從之。按周禮。王者祭昊天上帝。日月星辰。司中司命。風伯雨師。社稷五土五嶽。山林川澤。四方百物。兆四類。四望亦如之。禮春分祀朝日於東。秋分祀夕月於西。漢武帝郊泰畤。平旦出望宮東向揖日。其夕西向揖月。既郊。日月又不在東西郊也。後遂旦夕常拜。故魏文詔曰。漢氏不拜日於東郊。而旦夕常於殿下東西拜日月。頗褻似家人之禮。非事天神之道也。黃初二年正月乙亥。祀朝日于東門之外。又建禮二分之義。明帝太和元年二月丁亥。祀朝日于東郊。八月己丑。祀夕月于西郊。始得古禮。及武帝太康二年。有司奏。春分依舊請車駕祀朝日。寒溫未適。可不親出。詔曰。禮儀宜有常。若如所奏。與故太尉所撰不同。後

爲無定制也。問者方難未平。故每從所奏。今戎事猶息。惟此爲大。按此詔帝復爲親祀朝日也。此後廢。

東晉晉書禮志。元帝太興二年。三月。親郊饗配之禮。一依武帝始郊故事。是時尚未立北壇地祇衆神。共在天郊。成帝咸和八年。正月。立二郊。天郊從祀。則五帝之佐。日月五星。二十八宿。文昌。北斗。三台。司命。軒轅。后土。太一。天一。太微。勾陳。北極。雨師。雷電。司空。風伯。老人。凡六十二神。鄭樵通志略。北郊從祀。則五嶽。四望。四海。四瀆。五湖。五帝之佐。沂山。嶽山。霍山。醫無閭山。蔣山。松江。會稽山。錢塘江。先農。凡四十四神。江南諸小山。蓋江左所立。如漢西京關中小水。皆有祭秩也。二郊所秩。官有其注。是月辛未。祀北郊。以宣穆張后配地。魏氏故事。非晉舊也。

南宋南宋書禮志。孝武大明五年。依漢汶上儀。設五帝位。太祖文帝對焉。六年。帝親奉明堂祀。祭五時。帝以太祖配。

梁隋書禮儀志。南郊祀天。皇上帝之神於其上。以皇考太祖文帝配。五方上帝。太昊。祝融。黃帝。少昊。顓頊。五官之神。木。火。土。金。水。五行之神氣。太一天一。日月五星。二十八宿。太微。軒轅。文昌。北斗。三台。老人。風伯。司空。雷電。雨師。皆從祀。其二十八宿及雨師等座有坎。五帝亦如之。餘皆平地。太史

設紫壇於丙地。北郊祀后地之神。以德后配五官之神。先農五岳沂山。嶽山。白石山。霍山。無閭山。蔣山。四海。四瀆。松江。會稽江。錢塘江。四望皆從祀。太史設壇於壬地。馬十七年。帝以威仰魄實。俱是天帝。於壇則尊。於下則卑。且南郊所祭天皇。其五帝別有明堂之祀。不煩重設。又郊祀二十八宿。而無十二辰。於義闕然。於是南郊始除五帝祀。加十二辰座。與二十八宿。各得其方而爲壇。

陳魯吳中郊祀禮。武帝永定二年。正月。南郊除十二辰。風師。雨師。及五帝位。後魏隋書禮儀志。道武皇帝即位二年。正月。親祀上帝于南郊。置木主七於壇上。魏書禮志。二年正月。南郊。天位在壇上南面。五精帝在壇內。四帝各於其左。黃帝在末。日月五星二十八宿。天一太一。北斗。司中。司命。司祿。司人。在中壇內。各因其方。其餘從食者。合千餘神。醑在外壇內。北史魏本紀。明元帝太常三年。立五精帝。兆於四郊。以太皞等及諸佐配。

北齊隋書禮儀志。北齊制圓丘。正月上辛。祀昊天上帝於其上。以高祖神武皇帝配。五精之帝從事於其中。丘而皆內向。日月五星。北斗二十八宿。司中。司命。司人。司祿。風師。雨師。靈星於下。丘爲衆星之位。遷於內壇之中。後諸儒定禮。圓丘改以冬至歲正月上辛。一祀南郊。爲壇於圜南。祀所感。

帝靈威仰於壇。方澤則以夏至之日。禘崑崙皇地祇於其上。以武明皇后配。其神州之神。社稷岱岳沂鎮會稽鎮。云云。山亭亭山蒙山羽山嶧山松岳霍岳衡鎮荆山。內方山。大别山。敷淺原山。桐柏山。陪尾山。華岳。太岳。鎮積石山。龍門山。江山。岐山。荆山。嶠冢山。壺口山。雷首山。底柱山。析城山。王屋山。西傾朱圉山。鳥鼠同穴山。熊耳山。敦物山。蒙山。梁山。嶧山。武功山。太白山。恒岳。醫無閭山。鎮陰山。白登山。碣石山。太行山。狼山。封龍山。漳山。宣務山。閼山。方山。苟山。狹龍山。淮水。東海。泗水。沂水。淄水。澠水。江水。南海。漢水。穀水。洛水。伊水。漾水。沔水。河水。西海。黑水。潯水。渭水。涇水。鄭水。濟水。北海。松水。京水。桑乾水。漳水。呼沱水。衡水。洹水。祀其神州位在青陞之北甲寅地。社位赤陞之西未地。稷位白陞之南庚地。自餘並內壝之內。內向。各如其方。

後周隋書禮儀志。周制圓丘。以炎帝神農氏配。昊天上帝於其上。五方上帝。日月。內官。中官。外官。衆星並從。祀南郊。祀所感帝靈威仰於壇。後周五郊。祭配皆同。後齊星辰七宿。岳鎮海瀆。山林川澤。丘陵墳衍。亦各於其方配郊而祀之。

隋禮儀志。高祖受命。乃定祀典。爲圓丘於國之南。太陽門外。祀昊天

上帝於其上。五方上帝。日月五星。內官四十二座。次官一百三十六座。外官一百一十一座。衆星三百六十座。並皆從祀。上帝日月在丘之第二等。北斗五星。十二辰。河漢內官在丘第三等。二十八宿。中官在丘第四等。外官在內壇之內。衆星在內壇之外。凡祀昊天上帝。五方上帝。日月。爲大祀。星辰四望等爲中祀。司中。司命。風師。雨師。及諸星等爲小祀。天文志。經星中官。四方二十八宿。并輔官一百八十二星。星官在二十八宿之外者。多同晉志。自攝提至此。大凡二百五十四官。一千二百八十三星。并二十八宿輔官名曰經星。常宿遠近有度。小大有差。苟或失常。實表災異。爲方丘於宮城之北十四里。夏至之日。祭皇地祇於其上。以太祖配。神州迎州。冀州。兖州。徐州。揚州。九州山。海川。林澤。丘陵墳衍。原隰。並皆從祀。地祇及配帝在壇上。神州九州神座於第二等八陞之間。神州東南方。迎州南方。冀州兖州西南方。徐州西方。揚州西北方。營州北方。咸州東北方。陽州東方。九州山海已下各依方面。八陞之間。其冀州山林川澤。丘陵墳衍。於壇之南少西。

唐舊唐書禮儀志。武德初。定令。冬至祀天圓丘壇於京城明德門外道東二里。以景帝配。五方上帝。天文皆從祀。日月內中外官。及衆星皆從祀。其

五方帝。及日月七座在壇第二等。內官五星以下。五十五座。在第三等。二十八宿以下百三十五座。在第四等。外官百十二座。在外壇之內。衆星三百六十座。在外壇之外。夏至祭皇地祇於方丘。其壇在宮城之北十四里。壇制再成。下成六十丈。每禮地祇及配帝設位於壇上。神州及五岳四鎮四瀆四海五方山林川澤丘陵墳衍原隰並皆從祀。神州在壇之第二等。五岳已下三十七座在壇下外壇之外。丘陵等三十座在壇外。唐會要玄宗開元十一年十一月一日。參定南郊之禮。禮官秘書少監賀知章。禮儀使中書令張說等奏曰。晉元建武二年。定郊兆於建業之南郊。去城七里。一壇之上。尊卑雜位。千有五百神。去聖日遠。損益不同。臣等案祠令。五星已下。內官五十三座。中官一百六十座。外官一百四座。衆星三百六十一座。臣共所由勘史傳。及星經內外所主。職有尊卑。舊圖座位。升降頗錯。今奉墨勅。據尊卑升降。又新加杠星等座。摠三百一十九座。并衆星三百六十九座。凡六百八十七座。其圖如左。詔遂頒於有司。以爲常式。十六日。舊紀戊寅。親享圓丘。命張說爲禮儀使。韋縚爲副使。賀知章重定從祀星辰圖。革去東晉尊卑錯亂之失。二十年。蕭嵩爲中書令。改撰新禮。祀天一歲有四。冬至祀昊天上帝於圓丘。中官加爲一百五十九座。外官減爲一

百四座。上辛祈穀。祀昊天上帝。五方帝從祀。時起居舍人王仲立掌知修撰建議曰。按貞觀禮。正月上辛祀感帝於南郊。顯慶禮祀昊天上帝於圓丘以祈穀。左傳曰。郊而後耕。詩曰。噫嘻。春夏祈穀於上帝。禮記亦上辛祈穀于上帝。則祈穀之文。傳於歷代。上帝之號。允屬昊天。而鄭康成云。天之五帝。遞王。王者之興。必感其一。因其所感。別祭尊之。故夏正之月。祭其所生之帝於南郊。以其祖配之。故周祭靈威仰。以后稷配之。因以祈穀。據所說。祀感帝之意。本非祈穀。先儒所說。事恐難憑。今祈穀之禮。請準禮修之。且感帝之祀。行之自久。記曰。有其舉之。莫可廢也。請於祈穀之壇。遍祭五方帝。夫五帝者。五行之精。五行者。九穀之宗也。今請二禮並行。六神咸祀。從之。杜佑通典開元禮。冬至祀圓丘。儀禮前一日。晡後。太史令郊社令。各常服。帥其屬。升設昊天上帝神座於壇上。北方南向。設五方帝。日月神座於壇第一等。青帝於東陞之北。赤帝於南陞之東。黃帝於南陞之西。白帝於西陞之南。黑帝於北陞之西。大明於東陞之南。夜明於西陞之北。又設五星十二辰。河漢。及內官五十五座於第二等。十有二陞之間。各依方面。其內官有北辰座於東陞之北。曜魄寶於北陞之西。北斗於南陞之東。天一。太一。皆在北斗之東。五帝內座於曜魄寶之東。並差在行位前。新唐書。

太一一作紫微。餘內官諸星五星。十二辰。河漢。四十九星。差在後。又設二十八宿。及中官百五十九座於第三等。其二十八宿。及帝座。七公。日星。帝席。大角。攝提。太微。太子。明堂。軒轅。三台。五車。諸王。月星。織女。建星。天紀等十七座。並差在行位前。唐書作市垣帝座太微五帝餘中官一百四十二座。在後。又設外官百五座於內壇之內。又設衆星三百六十座於內壇之外。各依方次。十有二道之間。天寶中。術士蘇嘉慶上言。始置九宮神壇於城東。其壇一成。高三尺四陞。上依位置九小壇。東南曰招搖。正東曰軒轅。東北曰太陰。正南曰天一。中央曰天符。正北曰太一。西南曰攝提。正西曰咸池。西北曰青龍。五數爲中。戴九履一。左三右七。二四在上。六八爲下。符於遁甲。此則九宮之定位。每歲祭以四孟。隨改位。行恭謂之飛位。自乾元以後。止依本位祭之。遂不飛易。仍減冬夏二祭。曾與中郊祀禮。德宗建中元年正月。親拜郊。司天冬官正郭獻之奏。天皇大帝。北極天。太一。准星。經。及天寶中。勅並合併在第一等。制從之。貞元元年十一月。親郊。司天進圖。勅令禮官詳定。太常卿漢中王瑀與博士柳冕等奏曰。開元定禮。無之不刊。天寶改作。起自權制。此皆方士謬妄之說。非典禮之文。請依禮爲定。詔令復依開元禮。仍永爲則。舊唐書禮儀志。冬至祀昊天上帝於圓丘。以

高祖神堯皇帝配座在壇上。六百八十九座。壇之第一等祀。東方青帝靈威仰。南方赤帝赤熛怒。中央黃帝含樞紐。西方白帝白招拒。北方黑帝汁光紀。及大明夜明等七座。第二等祀。天皇大帝。北辰。北斗。天一。太一。紫微。五帝座。並差在行位前。餘內官諸座。及五星十二辰。河漢都四十九座。齊列在十二陛間。第三等祀。中官市垣帝座。七公。日星帝座。大角。攝提。太微太子。明堂軒轅。三台。五車。諸王。月星。織女。建星。天紀等十七座。及二十八宿。並差在前列。餘百四十二座。齊列。皆十有二陛間。又祀外官百五座。於內壇之內。又設衆星三百六十座。於內壇之外。按此星辰之位。蓋渾儀制圖。聖人觀象。義和所職。推步有微。傳曰。萬物之精。上爲衆星。故天有萬一千五百二十物。蓋星之與物。每各有所主。今並依郊壇圖而爲之也。正月。上辛祈穀。祀昊天上帝于圓丘。以高祖神堯皇帝配。都七座也。又祀五帝於壇第一等。

宋宋朝事實。太祖乾德元年。將有事于南郊。司天監新定從祀星辰圖。上之中書門下詳定。祀昊天上帝儀。設皇地祇之位。從祀五方五帝五星。總六百八十七位。有司議請以僖祖升配昊天上帝。太常少卿張昭請以宣祖崇配。詔從之。宋會要。太宗淳化二年。二月八月。吏部侍郎兼秘書監李

至言。伏見立春祀青帝。舊以句芒配。今以金提氏。及句芒配。按令式及開
寶禮。無金提配食之文。伏請止以句芒配。詔太常禮院參議。既而上言曰。
禮經並無金提氏並配。惟祭歷代帝王舊典。有金提句芒二神配太昊伏
犧氏廟。亦猶風后力牧后土俱配軒轅廟。其土王祀黃帝。止以后土從祭。
今請祀青帝日。去金提配座。祭歷代帝王。仍舊兼配。從之。元朝長編紀事
本末。真宗景德二年七月丁巳。詔以十一月十三日有事于南郊。上封事
者言。郊丘天地神位板。皆有司臨事書題。多不嚴肅。望令重造。行禮日置
於玉輅前。清道赴祠所。詔鹵簿使王欽若與內臣吳延厚詳閱修製。欽若
言。司天監供到南郊神位版內。有五方帝。青帝靈威仰。赤帝赤熛怒。黃帝
含樞紐。白帝白招拒。黑帝叶光紀。臣竊恐是五帝之名。理合迴避。詔太常
禮院并檢討官同詳定。以聞。既而上言。謹按儀禮鄭玄注。及開寶義纂。靈
威仰。赤熛怒。含樞紐。白招拒。叶光紀者。皆是五方帝號。又漢書注。五帝自
有名。即倉帝靈符。赤帝文祖。白帝顯紀。黑帝玄矩。黃帝神斗。是也。既為美
稱。不煩迴避。從之。欽若又言。南郊神位版。據司天監文籍壇陞之上。升降
未便。漢書郊祀志。五帝為天神之佐。今五帝在第一龕。天皇大帝在第二
龕。與六甲嶽瀆之類同處。北極衆星所拱。今與尚書大理之類。接席帝座。

爲天帝之尊。市肆斗斛官者之星附焉。今居尚書大理三公輔星第二等之下。與二十八宿積薪騰蛇杵臼之類。同在第三龕。卑主尊臣。甚未便也。如以北極帝座。本非天帝。蓋是天帝所居。則北極在第二龕。帝座在第三龕。亦高下未等。如以爲同在壇上。不拘等列。則陞龕差級。誠虛設矣。況所命行事官第一等以四品充。第二等以五品充。第三等以六品充。是則位既高而官亦崇矣。又太微之次。少左右執法。子星之次。少孫星。天輅當爲天福。天記當爲天紀。闕文未正。理合討論。望令司天監衆官參驗。詔欽若與禮儀使趙安仁。太常禮院司天監同檢討詳定以聞。欽若復言。因臣陳請不可復同商權。請委禮儀使等詳定。從之。既而安仁等言。得崇文院檢討杜鎬陳彭年狀。按開寶通禮。元氣昊天則稱昊天。據遠視之。蒼然則稱蒼天。人之所尊莫過於帝。託之於天。故稱上帝。天皇帝。即北辰耀魄寶也。自是星中之尊。易曰。日月麗乎天。百穀草木麗乎地。又曰。在天成象。在地成形。足明辰象非天。草木非地。是則天蒼昊爲體。不入星辰之列。又郊祀錄。壇之第二等祀天皇帝。北斗。天一。太一。紫微。五帝座。並差在行位前。餘內官諸位。及五星十二辰。河漢都四十九座。齊列俱在十二陞之間。唐建中元年。司天冬官正郭獻之。奏天皇。北極。天一。太一。準天寶中物。並

合升在第一等。從之。貞元二年親郊。令禮官詳定。太常卿漢中王瑀與博士柳冕等奏開元定禮垂之不刊。天寶改作起自權制。皆方士之說。非典禮之文。請依禮爲定。詔復從開元禮。仍爲定制。郊祀錄又云。壇之第三等有中官市垣帝座等十七座。並在開元禮義羅云。帝有五座。一在紫微宮。一在大角。一在太微宮。一在心。一在天。市垣即帝座者。非直指天帝也。又得判司天監史序狀。天皇帝一星在紫微勾陳中。其神曰耀魄寶。即天皇是星。五帝乃天帝也。北極五星在紫微垣內。居中一星曰北辰。第一主月爲太子。第二主日爲帝王。第三爲庶子。第四爲嫡子。第五爲天之摠。蓋北辰所主非一。又非帝座之比。太微垣十星有左右執法上將次將之名。不可備陳。故總名太微垣。星經舊載孫星而壇圖止有子星。辨其尊卑。不可同位。天賴主鑒輿輦較不當作福字。天記一星在午階第四龕。別有天紀。九星在寅階第三龕。壇圖並載不當改而爲一。竊惟壇圖舊定。悉有明據。天神定位。難以躋升。望依星經。悉以舊禮爲定。詔從安仁等議。十月六日。欽若復上言。舊史天文志並云。北極。北辰最尊者。又勾陳口中一星曰天皇帝。又鄭玄注。周禮謂禮天者。冬至祭天皇於北極也。後魏孝文極六宗亦升天皇列五帝之上。此皆良史鴻儒所述。豈皆方士謬妄耶。古禮

舊制未必全是。至如九宮貴神。天寶立祀在宗廟之上。文宗初舒元輿輒率鄙見降爲中祀。厥後水旱作沴。元輿果以覆族。往者陛下特頒明詔。列爲大祀。靈心昭答。景福並臻。今如以方士爲妄。即九宮之祀可廢乎。至如中市帝座。雖前代未有異論。按晉書天文志。帝座光而潤。則天子吉。威令行。既名帝座。則爲天子所占。列于下位。未見其可。又安仁所議。以子孫二星不可同位。陛下方洽高禩之慶。以廣維城之基。苟因前代闕文。便爲得禮。實恐聖朝茂典。猶未適中。豈可信正元之末學輕談。略經史之群儒讜論。除執法天輟天記三星。安仁已有典據。今請如舊。其天皇北極帝座。孫星四座。臣已新制版位。恭俟宸旨。詔天皇北極特升在第一龕。又設孫星位于子星之次。帝座如故。十日復言帝座止三在紫微太微者。已列第二等。唯天市一座在第三等。此人情之所未安也。又晉志。大角及心中星。但云天王座。實與帝座不類也。詔特升在第二龕。十一月乙巳朔。南簿使王欽若奉神位板對于便殿壇上四位。塗以朱漆金字。自餘皆黑漆。第一等金字。第二等黃字。第三等以降朱字。悉貯以漆押。覆以黃縑帊。上降階觀之。即付有司。仍戒各謹其事。禮儀使趙安仁上新定壇圖。且言郊壇神位。今依儀注寫定。望付司天監製爲絳圖。壇上神位四。昊天上帝。皇地祇。太

祖太宗第一等神位八。五方帝。日月。神州地祇。第二等神位七十三。北辰曜魄寶。北斗。天一。太一。五帝內座。凡六位。差在前。五星十二辰。河漢暨內官四十九座。嶽鎮海瀆十八座。凡六十九位。差在後。第三等神位百七十九。二十八宿帝座。七公。月星。帝席。大角。攝提。太微垣。太子。明堂。軒轅。三台。五車。諸王。月星。織女。建星。天紀。凡四十五位。差在前。二十八宿暨中官百五十九座。山林川澤二十座。凡百三十四位。差在後。內壇之內。神位百三十五。外官百五座。丘陵墳衍原隰三十座。並齊列內壇之外。衆星三百六十。並齊列總七百五十九座。第二等五岳。第三等四帝座。黃帝座。舊圖差在前。皆合在後。河漢中鎮。舊圖在第三等。據儀注合在第二等。並乞刊正從之。大中祥符元年二月十九日。皇城使劉承珪言。準詔新造郊祀壇。吳天上帝。皇地祇配座。太祖太宗神位版。詔有司嚴於嚴潔之所。以備親祠。八月詔九宮之神。所職尤重。將來封祀。宜別擇地。建壇致享。依大祠禮例施行。唐天寶中。九宮貴神次。吳天帝。文宗太和中。降爲中祀。武宗會昌中。復升大祀。宋初爲中祠。咸平四年三月。以杜鎬等議。升爲大祀。壇再成。上安小壇。凡玉用兩珪。有卽帶如方色四階之外。西南又爲一階。曰坤道。入門行事升降之所。後兩壇御書祝版。餘禮同社稷。二年九月十九日。翰林

天文刑中和言。伏親景德三年周伯星出亢宿之下。按天文志。角亢爲太山之根。果符封禪告成之事。望自今郊祀列位於亢宿之間。詔太常禮院與司天監參議。遂上言。周伯星出氐三度。然亢氐皆鄭兗州分望。侯親郊列於氐宿壽星之次。從之。四年十二月。龍圖閣待制孫奭言。謹按禮文祀昊天上帝于圓丘。有司攝事祇以天神從祀。當有六百九十位。而近歲冬至祀昊天。乃以五方上帝及五人帝五人神從祀。并配座共十七位。而天皇大帝以下。絕無奉祀之文。且夫太皞句芒等。俱非冬至從祀之神。惟孟夏雩祀季秋大享明堂及之。今乃祀於冬至。其爲差異。恐未叶宜。詔兩制與崇文院檢討詳定。以開翰林學士晁迥等言。按月令。十一月祀昊天上帝於圓丘。注云。以五方帝日月星辰及内外星官從祀。五月祀皇地祇於方丘。注云。以岳瀆等神從祀。又按開元禮郊祀錄。開寶通禮。冬至祀圓丘有司攝事。壇上祭昊天上帝配帝。第一等祭五方帝日月七座。第二等祭五星而下五十五座。第三等祭二十八宿而下百五十九座。內壇之內祭外官百五座。內壇之外祭衆星三百六十座。總六百八十八座。孟夏雩祀。季秋大享明堂。壇上祭昊天上帝配帝。第一等祭五天帝。第二等祭五人帝。壇下祭五官總十七座。夏至祀方丘。壇上祭皇地祇配帝。第一等祭神州。